

Ч. 7. (91.)

Крыница, четверг дня 20. лютого (7.) 1936.

Рок III.



Орган Лемковского Союза.

Выходит в каждый четверг.

Редакция и администрация в Крынице. — Адрес „Лемко” Крыница.

Всіх читателей, котры не вплатили ище пренумераты, просиме выровнати якнайскорше рахунки.

Ище ест на складі **Календар** „Лемка” на 1936-ый рок.

Ціна одного календара выносит **50 гр.** При замовленях 10 календарей оплату почтову платит редакция.

Пренумерата в краю:
30 грошей місячно,
80 „ квартално
1.50 „ полрочно,
3 зл. рочно.
В Америкі: 1 дол. рочно.
В Чехословакии:
2 кор. місячно, 10 кор. полрочно,
20 кор. рочно.
Ціны оголошень:
Ціла сторона 120 зл., 1/2 сто-
роны 60 зл., 1/4 стороны 35 зл.,
1/8 стор. 20 зл., 1/16 стор. 10 зл.,
оголошення малы за 1 мм. 20 гр.,
в тексті 30 гр., перед текстом
40 гр. При місячном и долшом
оголошеню значна знижка.
Кonto чекове Нр. 404.155.

Што жадат мин. Рачкевич от административных урядников.

Каждого року, коли парламент укладат новый бюджет державы, коли переводит подробну анализу ріжних галузей его діяльности, высuvat ся ряд справ, котры живо интересуют загал населеня, котры с одной стороны сут основными справами державного житя, а с другой стороны, с точки зрѣня штоденной, причином смутку або радости поодыноких людей. Так стало ся также с дискусіом бюджетном комиссии Сейма над бюджетом Министерстерства внутренних діл, в часі котрой министр Рачкевич, бесідуючи о многих квестиях, относячих ся до работы загалной администрации, порушил пару квестий маючих значенє великой вагы для одноцільности державного житя, а одночасно интересующих найближе поодыноких людей в их штоденном житю.

Тож бесідовал п. Министр о квестии бюрократии, той бюрократии, котра так докучливо дає ся отчути каждому гражданину, — бюрократии, котра не повстала с [вины урядничого апарата, але с особенного уложєня ся обстоятельств, котре урядники ряды придусили тысячами параграфов, тысячами законов и заряджень. Апарат административный, если не буде придушенный тысячами приписов, сполнит напевно совсем правильну тезу министра Рачкевича о конечности увселюдненя администрации, тісно-го и разумного звязаня той администрации с населєнєм.

До переведєня той задачи в великой степени може ся причинити предсказане премиером Косцялковским, а пак министром Рачкевичом открытє дороги до работы в администрации для людей молодых. „Молодеж — бесідовал Министр в бюджетной комиссии — не закостнїла в рутині, особенно тота, котра переходит до администрации со

службы общественной и знає потребности общества на меньшей або большей территории, ест цінным элементом в службі загалной администрации.

С глубокою признательностью треба принять заявлєнє министра Рачкевича, же служба на постерунку урядника державного мусит быти все и для каждого жерелом радости и души. Без сомнїя так правильно поставлена квестия личного достоинства урядника даст полный свой выраз втотчас, если буде результатом уцтиво сполненной службы, — разумно сполненого обовязка.

А обовязки административного апарата сут великы, так великы, же як бесідовал министр: „без увеличеня усилий через загал урядников администрации трудны до осягненя мусили бы быти загалны результаты деятельности цілого ресорта”.

Тож трудна и тяжка ест „Служба Державі”, але не меньше почетна. Тож нич дивного, же люды, котры своей службы, ей духа и задач не понимают, будут мусити отойти. Бо зла служба не лем не приносит державі користи, але наоборот, може вырядити моц шкоды. И прото с признательностью треба принять ведєну министром Рачкевичом борбу с так тяжкыма прегрїшенями урядничима, як бюрократизм в найгоршом змыслі, легкомышленне спыханє и позбыванє ся прав, всьо, што доказує брак почутя обовязка, недостаток почутя вырядженой населєню кривды.

Всі тоты чинники, относячи ся до квестий административного апарата и духа, яким могут быти пересякнены урядники ряды в службі для Державы, чинники, о котрых бесідовал Министр Рачкевич, станут ся безпорно причином полного объективизма населєня в виду работы администрации и справедливой оціны той работы.

Котюзі по заслугі.

В третом числі нашої газеты в статье „Смїхотворный самообман” писали мы о слезах, якы проливат „Український Бескид” над судьбом украинской гетманской державы, котра розлетїла ся нибыто наслідком бунту поднятого против ней через самых украинцов, а котра в дійстности, як мы выказали, розлетїла ся длятого, бо німцы, котры ю создали и своима багнетами поддерживали, остали розбиты.

Послухайме тепер, як описує в цілої той авантурі ролю наших галицкых украинцов украинский деятель-державник Вячеслав Липинский. Пише он так:

„Галичани, які гасло — „шляк до Львова веде через Київ” — розуміют так, що би покидати Львів, та ити до Києва, піддержувати тамошніх соціальных революціонерів і політичних руйніників, — Галичани, які в Києві роблят повстання протів Українського Гетьманського Уряду тому, що він „московільський”, — Галичани, які поваливши такий українский „московільський” уряд, шукают союзу з московським урядом Денікіна, або проповідуют орієнтацію на московських большевиків, — Галичани, які братают ся з наддніпрянськими хаотиками — галайками, проголошуют з ними „соборність” кличут їх до себе в Галичину, слухают побожно їх терєвенів про „похід на Москву” а потім плачут, коли ці хаотики або „змїнили віхи” і втікли в Москву, або в Варшаві відступили Галичину Полякам — такі Галичани хай мают принаймні стільки розуму, що би причини всіх своїх нещасть шукати в самих собі, а не в „Папі римському” чи „амбасадорах антанті”...

Слова тоты цінны длятого, што написаны коренным стопроцентным украинцем а не якимсь ворогом „кацапом” або поляком, адже написаны человеком, котрый душу и моральну вартость галицкых „українців” роскусил своима зубами. И не диво, што така „вдача” у наших галицкых „українців”

Люды, котры отrekli ся своего имени и роду—люды, котры стыдають ся того, што найдорозше каждому честному чоловіку, што найдорозше каждому народови—люды, котры хотят сотворити нову націю на основах ненависти до национальной минувшости, націю без роду и племени — мусят метати ся и блукати, як тот шалений, котрый не зазнає спокою ни днем ни ночью.

Одинокий стальной их союзник то германец, котрый их создал и при помочи котрого надіють ся выбороти „самостійну Україну“, а наколи помоч німца не помагат, тогда блукать от Анны до Каяфы, от Деникина до Петлюры.

Але находят они и иных „панов“, котрым служат, котрым ся запродают. Не гордят фондами литовскыма, а также и в Англии глядають собі выгодного корыта. А коли уж нигде не находят доброй наживы, тогда идут с покутом до Варшавы, бьют ся в груди и заклинають о своей „льояльности“.



С фронту италиянско-абисынского.

Италияны боронят ся на полночи, а на полудни наступают.

На фронті ніт в послідных часах нияких поважных змін. Так на полночи, як и на полудни приготавлиють ся до офензывы, с тым розличієм, же на полночи приготавлиють офензыву абисынцы, а италияны боронят ся, а на полудни абисынцы борють ся, штобы удержати свои позиции перед атакующима италиянами.

На фронті полночном

Италияны напрасно старають ся переломити желізну обруч, окружающую Макале. Летничі атаки не мають однак великого значеня в виду неуловимых и добре укрытых в терені адисынских отділов. Италияны в виду того старають ся атаковать головну квартиру абисынских войск в Десие. Недільна атака была найсильніша со всіх дотеперешных италиянских в часі той войны. Перешло годину без перервы атаквало місто 7 италиянских самолетов. Много будынков стало в огні. Через якийси час місто выглядало як одно море огня. В абисынских кругах твердят, же ціль той атаки была охота збомбардовать дом, в котром жил негус. Ряд бомб упало недалеко цисарского дворца. Негус однак находил ся в безопасном місци и сам руководил при арматах противлетничих.



Конфликт японско-советский на Дальнем Востоке.

На дальнем Востоке разыгрывают ся факты, котры могут мати великое значенє. В Манджурии и Внѣшней Монголии (Полночный Кытай) доходит все до взаимных нападков граничных японско-советских.

Доходят вѣсти, же положенє єст барз напряжене и обѣ стороны зберают на пограничѣ свои войска. Всьо того показує, же легко може прийти до войны японско-советской. Гдѣкотры газеты доносят, же война може выбухнуть каждого дня.



Розрухи в Египті.

Египтяне жадают независимости.

Внет по выбуху абисынской войны прилетѣли вѣсти с другого афрыканского краю, Египта, же начали ся там розрухи. Египтяне в бѣлых турбанах и червѣных фезах громадили ся на сонечных площах своей столицы Каира и в портѣ Александрии и кричали: „Проч с Англиом!“ Най жиє свобода и независимость!“ и наперали оружино на полицию.

Недавно знова розрухи поновили ся. Рей водили студенты, котры перерѣзали улицы барыкадами. Полиция розбивала тоты перешкоды, с обох сторон сут ранены и убиты. В послѣдней манифестации полиция устроила немилу неожиданность; вмѣсто оружия употребила совсем нове средство. Коли росогнены громады манифестантов появили ся на улицах, полицейный отділ надѣхал со сикавком. На толпу выляно струи какойси барвной течи. Турбаны, бѣлы опончи, лица и руки покрыли ся в одной хвилѣ плямами. Остужены манифестанты розбігли ся. Полиция однак выловила их, бо теч, хоц нешкочлива, не дала ся змыти. Во главѣ полиции, як оказалось ся погодивше, стоял комендант Англик.

Откаль взял ся тот чужий комендант во главѣ египетской полиции? Ци Египет єст независимом державом и о што ходит египтянам, котры робят розрухи?

Египет єст вправдѣ отрубном державом, маючом своего короля и правительство, але не совсем независимом, бо находит ся под протекторатом Англии.

Памятники в Египті.

Египет єст найстаршим краєм на свѣтѣ. Знаме с библіи, же жиды находили ся в неволѣ фараонов (королей египетских) и же Мойсей выпровадил их с Египта через Червѣне Море до Палестыны. Уж на 2 тысячи лѣт перед Христом были в Египті великы міста, дворцы фараонов, свѣтыні богов сонца и других божеств, фараоны гнали военных невольников и своих подданных до копаня каналов и зборников воды, потребных для краю и до будовы роскошных гробниц и свѣтынь. До тепер в пустынных пѣсках, недалеко Каира стоят памятники давной свѣтлости Египта и удивляют зрѣтеля своим будовом. Сут то так званы пирамиды, або чотыроугольны будынки о спадистых стѣнах, котры збігають ся в оден шпиль в горѣ. Пирамиды сут высши от найвысших наших церквей. При одной такой пирамидѣ лежит выкута в скалѣ величезна потвора о львом тѣлѣ и человѣческом лицѣ — таинственный и загадочный сфинкс.

Борба о Египет.

До Египта вдерали ся рѣжны наїзды. По нападах варварских народов, завоевали Египет Римляне, а потом вдерли ся арабы. По арабах достал ся Египет Туркам. С Турками воєвал о Египет Наполеон. Наполеон в Египті порвал за собом вояков до шаленого боя, коли указал на пирамиды и закликал. „Рыцары, тридцѣть столѣть смотрит на вас с тых пирамид!“ Рыцарам в одной хвилѣ показало ся, же пирамиды отжили, же живы существа смотрят на них со шпилев тых каменных гор, шмарили ся до боя и розбили турков и арабов.

Чом воєвали о Египет.

О Египет бороли ся все, бо лежит он в місци переходном. Ту Афрыка граничит с Азией и через Середземне Море лучит ся с Европом. Египет творит окно так с Азией, як и с Европой. В старинных часах называно Египет даром рѣки Ниль, бо тот величезна рѣка несе со своих жерел уроджайный мул, котрый в часѣ вылива осѣдат по обох боках рѣки и удобряет побережье.

Як великий єст Египет.

Египет єст полтрета раз больший от Польщи, але вартость представляет лем узка полоса над Нилем, в которой жиє около 14 миллионов населеня. Дальше на восток и запад тягнѣ ся пѣсковата и каменная пустыня, в которой лем зрѣдка находят ся оазы с водом, травом и пальмами. Головне місто Каир числит около миллион населеня, а Александрия над Середземном Морѣ около 1/2 миллиона.

Египет жиє переважно с управы землі. На поля низше положены наносит рѣка в часѣ вылива благословенный мул а поля высши наводняють египтяне штучно помпами. Сіють пшеницу, ячмень, кукурудзу, конич, рыж, просо, рослины стручковы, місцами цукрову тростину и баволну. Климат поза пустыньом єст мягкий, теплый и приятный.

Кто жиє в Египті.

До недавна и через цѣле тысяч лѣт панамы Египта были турки и арабы. Арабы вырыли на Египті свое незатѣртѣ пятно. Египет єст до тепер краєм на половину арабским с обычаєв, а передовсем с религии. Египтяне сут магометанами, а лем мала часть єст християнска обряда коптского, зближенного до абисынского.

Значенє Египта.

Перевозне значенє Египта увеличило ся от часу перекопаня канала Суэзского в р. 1869. Канал тот лучит через Середземне Море Атлантический Океан с Червѣным Морем и Океаном Индийским, аджек край египетский с Индіями и тому владѣтели Индій, Англикы вырвали перед войном Египет с рук турков. Англикы дали Египтови велику автономію, задержавши для себе протекторат. На всякий случай держат они в Египті 30 тысяч войска втотчас, коли египтяне мають своего войска лем 10 тысяч. Во главѣ полиции египетской стоит также англицкий комендант.

Тепер молоде поколѣнє египтян хотѣло бы высвободити ся спод протектората Англии и начинат выкликати рѣжны розрухи. Кто знає, ци Италия не помагат в выкликаню тых розрухов. Але старши политики боят ся италиянов, бо видят их господарку в сусѣдной Либии и хоц хотят также цѣлковитой независимости, предлагают Англии вѣчный союз и взаимну помоч на случай войны.

Так отозвала ся война в сусѣдной Абисинии и свѣт с неспокоєм смотрит, ци таких отзвуков не буде больше.



Совітські самолёти бомбардують Манджурію.

Два совітські самолёти шмарили 8 бомб на територію Манджуко.

Правительство манджурске уважат того бомбардуванє за начатє войны без формального wypowiedжєня.

Последны пробы ратованя мира.

Очи всіх сут тепер звернены на Японію. От ней зависит мир або выбух новой войны. В Токио борют ся медже собом два обозы, стоячи в найвысших правительственных кругах.

Армия хоче приступити зараз до войны, а дыпльомация хотіла бы огложити войну до отвітного часу. На разі надіют ся, же побідит погляд дыпльомации и до войны не дойде. Круги добре поинформованы судят, же японський министр Гирота предложит совітському правительству утворенє

сталой комисии,

котрой задачом буде не допустити до конфликтов на границі Манджу-Куо и С.С.С.Р.

Также и в Лондоні вірят, же на разі до войны не дойде, бо теперешный час єст не отвітный для ведєня воєнной кампаніи в Монголии, где ростопы сніжны и квітні унеможливят всякы воєнны операции.



Англия иде с Росиом.

Акція зближеня ся В. Британіи и Совітов поступат скоро.

В недалекой будучности выберє ся до Росии бритийска парламентарна делегация. Будє ся она складати с представителей обох Палат и має обняти всі партийны группы англицкого парламента.

Газеты подають, же последны приключєня отвернули увагу министра Идена от Женевы и италянської політики в Африці, а звернули ю на Далекий Восток. Англия приготавлият ся не на жарты до войны и перєзначила на вооружєнє суму около 10 миллионів злотых, котра то сума має быти выдана в найблизших 10-ох місяцах.

Англия вірит, же от ей вооружєня єст зависимый мир в Европі. Ци даст ся єго удержати, увидимє. На разі всьо промовлят за тым, же скоро будемє свідками великой войны.



Важне для нас всіх

В понеділок дня 3 марта о год 12. в дому г-на Евстахия Милянчи в Мушині на рынку отбудє ся

основательне собранє Гуртового кооператива

для сел положєных вокруг Мушины.

Просит ся всіх войтов, солтысов, склепаров и свідомых людей прибыти численно на тото собранє. Реферат о кооперации выголосит г-н Яновицкий с Крыниці.

Допись со Щавника.

В ч. 3-ом с дня 1. лютого 1936 украинской газеты „Наш Лемко” помістил наш односельчанин О. Николай Милянч допись п. 3. „Правдива історія про село Щавник на Лемківщині”, в котрой старат ся доказати, же неправда єст, же Милянчи походять с Сербии и же они являют ся основателями села Щавника. Мы, хлопы со Щавника, не можеме навести вам историчных фактов с библиотек университетских або епископальных в Кракові, бо мы там школ не кончили, а дакотры с нас як нпр. „дальший гость”, носили вам О. Николай лем хліб до Санча, як сте там ходили до гимназии, але за то мы точно знаме стары акты, относячи ся до основаня Щавника, в котрых выразно єст подано, же основателями Щавника сут Мняляничи (Милянчи), котры приїхали с Сербии и визнавали віру православну. Акты тоты находят ся в дому Ч. 43. [и радили бы мы вам О. Николай приїхати до Щавника и тоты акты пересмотріти, а также почислити тых украинцев в селі, котрых вы, числячи с Мочар, нараховали аж половину села. Пишете „вітченьку”, же давнійше мы были руснаками, але же назва „Русь” єст престаріла и же тепер русский народ „по світової війні міняє назву на українців, з ріжних оглядів більше для нього підходячу”. Назву міняли все западны народы „чомуж тільки русини мали б стояти на місці”. На тоты дітинячи выводы можеме лем одно сказати: чомуж то вы „вітченьку” не міняте своєю старою назвою Милянч на нову, от н. пр. на Хруньпотькайло, або Брыдошенько, або Цыганенько, лем стоите на місци, преця „ця назва с ріжних оглядів була би для вас більше підходяча” и допасована до новой назвы украина, як ваша дотеперешна назва, но и в слід за тым, скорше „повіє краший вітер зіпід сонця”. Віял вам вітер и світило сонце за давной Австрии, бо сте каждого руского человека очернили перед властями и каждый мусіл отпокутовати в Талергофі, тисячи положили свои кости под „соснами” и тысячи зависли на придорожных вербах.

Втотчас світило вам сонце, бо сте думали, же загине уж Русь.

Але горе тому, кто будує свою „самостійність” на кырви своих братов. Будте спокійны, же не загинув и не загине русский народ, не загине и не пропаде правдива історія Руси и правдиве зерно потопленє в ріках кырви и мук, а доказом того єст Талергофський Праздник во Львові дня 30. мая 1934 р., на котром было понад 16000 народа, приїхавшого со всіх закутин Польши. Видите с того, же ище не всіх вывішали и лучше зробіте, як, вмісто ширити роздор и незгоду, призадумате ся над бідом робочого народа и будете старати ся помочи єму економічно.

Члены читальні.

Щавник, дня 10.II. 1936.



Комедия в церкви.

Наш о. Качмар зневажат дальше нашу церков и уряджат на проповідях віча. Недавно на проповіді высмівал громадску власть, зневажал ю и говорил, штобы ю неслухати и сміяти ся с ней. Люды в слід за „панвітцем” одны сміяли ся в церкви, а други злостили и повстал такий шум, як на

комедии. В церкви хотіл перевести видно и выборы, бо предложил, штобы выбрати якуси таку особу, котра бы рядила в громаді по єго волі. Доправды, уж трудно выслухати того вшиткого. Люды приходять до церкви, жебы ся помолити, а ту вмісто слова Божого, чує ся лем все прозівкы и публикованє.



ПАСІЧНИКАМ ПОВ. НОВОСАНДЕЦКОГО ДО ВІДОМОСТИ.

Правленє Окружного Союза Пасічников при О. Т. Р. в Новом Санчі повідомлят, же 18. т. м. отбыло ся повітове собранє пасічников, на котром был делегат Союза Пасічников с Кракова.

На том собраню обговорєно плян діяльности, справу пасічних курсов с показами в пасіках, розділ цукру, організацію пасічних курсов, основанє пасічного кооператива, справу медженародного сїзда пасічников в Кракові и выголошено актуальны отчиты о пасічництві.

Правленє Окр. Союза Пасічников просит М. Г. Пасічников повіта новосандецкого звертати ся во всіх пасічних ділах о порады, цукор и т. д. до г-на Осифа Яновицкого в Крыниці-селі.



ПОТЕРПІЛИ, БО НЕ ЧИТАЮТ ГАЗЕТ.

Перед кількома тыжднями помістили мы в Лемку Зарядженє Президента Р. П. нормуюче справу збераня всяких пожертвовань, як квест, фантов и т. д.

В том зарядженю сказано выразно, же на каждый збор так на публичных місцах, як и через ходженє от хаты до хаты, єст потрібне позволенє Староства, а кто зберат пожертвованя без позволеня, наражат ся на кару до 1000 зл. або на арест до 6 місяцов.

На всі однак читают газеты и знають о том зарядженю. Трафило ся в Крыниці селі, же Лешко Граб, Петро Синява, Петро Гальчак и Осиф Звір збрали по селі якыси гроши и Староство в Н. Санчі засудило их на кару по 100 зл. каждого, с заміном в разі неможности стягнення той кары на 4 тыждні ареста.

Пригадуєме тото зарядженє тому, штобы предохранити других перед евентуальными карами, причом выясняєме, же незнанє права не освободжат от кары.



УКРАИНСКИЙ ОТЧЕ НАШ.

Батьку наш, котрый маєш хутір на небесіх, Будь батьком для нас, але не для всіх!

До „кацапів” и ляхів не признавай ся, Лем нашої ненькы Украины тримай ся!

А як будеш с нами в згоді жити, То Твоя воля буде ся святити!

Бо мы долго не могли ся рішити, Чи украинці с Богом, чи без Бога мають жити.

Отже пануй Собі в згоді, В украинськїм народі!!

Подслухал: Ваньо Сокрырка.

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО”

Што чути в світі.

В льондонском шпиталі хирурги перевели незвычайну операцию одному 5-літньому хлопцу, котрый от уродження не мог отворити повік с причины недостатка мускулов, подносячих повікы. Хлопцу перещеплено фрагменты мускулов с уда до повік и хлопец отверат тепер очи нормально.

Парыж: Организация бывших властителей российских паперов вартостных выписала до министра заграничных діл Фляндена лист с протестом против уділення Совітам пожичкы, покля не сплатят они давных царских долгов.

Дамашек: Высокий комисар принял делегацию населеня сырийского, котре жадало: 1) привернення конституции, котру приготовило сырийске Народне Собранє, 2) опушення сырийской землі через французскы войска и 3) проклямованя „Сырийской Унии“.

Льондон: Коронаційне торжество короля Едварда VIII. отбуде ся в маю 1937. р. В желтні 1937. р. король английкый выіде до Индий, где отбуде ся его коронация на цисара Индий.

Льондон: Англицкы газеты подают, же нова програма вооруженя Англии єст розложена на 5 літ. Выдаткы на тоту ціль вынесут 300 миллионов фунтов стерлингов (7½ миллиарда злотых). Програма предвиджат будову 12000 самолетов, 11 панцырных кораблей, 36 кораблей, 30 подводных лодей, 10 контрторпедных кораблей, соткы чолгов и тягарных автомобилей и тысячи машиновых карабинов.

Берлин: В німецкых хемічных лябораториях вынайдено новый могучий газ трующий, котрый має перевышати всі знаны до тепер хемічны средства. Одыноком охороном против дійствам того газу мають быти серебряны маски, котры однак сут за дороги, штобы можна их выробити для населеня и войска.

Цареград: В многих місцевостях Турции заляла вода землю и знищила засівы. Материяльны втраты сут превеликы.

Брукселя: Министер войны Бельгии в часі бесіды на с'їзді бывших военных заявил, же от часу, коли Німеччина веде открыто усиленне вооруженє, армия бельгийска єст приготовлена понести якнайдалше идучи пожертвованя, бодай лем недопустити врага на свою землю.

Льондон: Англицка газета „Таймс“ доносит, же военный бюджет С.С.С.Р. на 1936/37р. єст проєктований в высоті 14 миллиардов рублей. В продолженю 3 літ Совіты выдадут на вооруженє 30 миллиардов злотых, або 80½ миллионов місячно. Німеччина выдає на вооруженє 1 миллиард зл. місячно, а Польша 64 миллионы.

Парыж: Пребывающий в Парижі маршал Тухачевский отбыл ряд конференций с министрами войны, летунства, воен. марынаркы, а также начальником генерального

штаба и поробил замовленя на доставу военных материялов.

Прага: Ческа газета „Narodni Osvobozeni“ доносит, же Совіты предложили Чехословакии дати роботу около 50 тысяч работников при лісных работах на Сыбири в околицах Байкала. Ходило бы головно о работников лісовых с Подкарпатской Руси и Словакии, котры могли бы выемигровати до Совітов аж и на стало с родинами.

Штокгольм: Шведскы фаховы газеты доносят, же Росия має тепер 9000 самолетов. С того числа має армия 3000 самолетов, 2 тысячи — то резерва армии, 1000 мають военны школы, 1000 Perezначено для торговельных и полицийных цілей, 1000 належит до ріжных спортивных товариств авиацийных. Крім того 1000 машин Perezначено jako резерву для школеня цивильных пильотов. Новый промышленный плян предвиджує рочну продукцию 5000 самолетов и 18 тысяч моторов. На штрєці Москва-Владывосток курсуют самолеты о скорости 300 км. на годину. Газеты подают, же под взглядом авиацийным Росия занимает тепер перше місце.

Вісти с краю.

Варшава, дня 7.ІІ. П. Президент Р. П. именовал вицеминистра финансов Адама Коца председателем Рады Банка Польского.

Варшава: Зарядженєм министерства финансов ціну спирта, Perezначеного на промышленны ціли обнижено о 30 00, а ціну спирта денатурованого о 1700.

Варшава: Министер внутр. діл выдал зарядженє, котре заборонят носити при собі оружие біле, а именно: шаблі, багнеты, ножи и т. д. Торговельны предприятия не будут мочи продавати без позволеня властей оружия ноторычно уживаного через преступны типы, а именно: кастетов, металевых боксеров, оружия скрытого в палках, специальных пружин до битя и т. п.

Варшава: Уряд Державных Долгов оголошує, же многы властители облигаций не зголосили ся по выграны гроши. Так нпр. при Будовляной Пожичці не отобрано пре-

мий на 677.000 зл. При Инвестиционной Пожичці остало до отобраня премий на 600.000 По пятох літах не отобрана сума перейде на власность Скарбу Державы.

Самбор: Невысліджены преступники в сєлі Шаді пов. самборского обрабовали церков, а пак поукладали в чотырох кутах деревяны меблі, орнаты и книги, обляли того всьо нафтом и подпалили. Церков деревяна, побудована в р. 1835 спалила ся до тла.

На Поморі сут ище 4 міста: Ласин, Подгурж, Пельплин и Ковалево, в котрых ніт ани одного жида.

В неділю, дня 23. лютого 1936

о год. 2-гой по полудни

отбуде ся в Щавнику пов. сандецкого

в домі читальні

Обще Собранє

ЧЛЕНОВ ЧИТ. ИМ. М. КАЧКОВСКОГО, на котре выділ запрашат всіх рускых интеллигентов и людей с сусідных сел.

Порядок собрания:

- 1) Открытє собрания и выбор презыдии.
- 2) Отчитанє протокола с послідного собрания.
- 3) Доклад касовый и с діятельности выділа и уділенє абсолютории.
- 4) Выбор нового выділа.
- 5) Внесєня членов.

Секретар: Предсідатель:
Василь Барновский Осиф Яценник.

Згинул 9.ІІ. рано пес,

великий, грубый, масти бурой,
звати „Песь о“!

Кто бы знал місце побыта, просит ся донести за вынагородженєм до г. Юрка Петрыка, зя ріком коло школы в Крыниці-Сєлі

ревиз. Яновицкый.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

заасекурує ся

в асекураційном Товаристві

Вита и Краковске
во ЛЬВОВІ

Асекурацію принимают на цілой Лемковщині
представителі: гг. Осиф Яновицкый — Крыница-Сєло и Ми-
хаил Перелом — Сянок.